

皇

明

書

皇明書卷之十八

新城縣志卷之十八 鄧元錫錄

臣謨

弘治謨

王文恪公鏊字濟之蘇州吳縣人少穎不凡年十六  
隨父學太學太學諸生爭傳誦其文一時先達咸  
屈年行求爲友陳御史選提學時以天下士奇之  
成化中舉進士高第入翰林爲編修聲名藉甚而  
閉門力學避權勢如畏浼以學士日講至天理人  
欲君子小人之辨必反覆盡啓沃上游後苑左

右諫不聽鏊進講文王不敢般于游畋上爲罷  
游講罷詔諸近幸戒之曰今日講官所指殆爲若  
等好爲之東宮將出閣大臣請選端人正國本薦  
兼諭德陞吏右侍郎會虜火篩入寇上籌邊八  
事且薦秦紘起總制陝西又請於科貢外依前代  
制科如博學宏詞之類六年一舉儲翰林次科道  
官以拔收材異使天下士以通經學古爲高議不  
行正德初闖禍作瑾欲引冢宰芳入內閣而衆會  
推鏊於是進尚書文淵閣大學士與芳並入閣逾  
年進少傅改武英瑾方威鉗士類索微瑕輒械繫

死者累累乃亟言於瑾曰士大夫可殺不可辱今  
既殺之又復辱之吾何顏於此前後救諸大臣有  
才望得禍者尤力語具 帝紀中瑾議殺廢后吳  
氏之喪曰不可以成服鏊念后於 敬皇帝有保  
護功曰服可不成葬不可以苟景泰汪妃薨疑其  
禮鏊曰妃廢不以罪當葬以妃祭以后皆從之當  
是時瑾權傾中外雖意不在鏊然見鏊開誠與之  
言初亦間聽久之芳專事嬖阿而瑾驕悖日益甚  
鏊過之不得常戚戚以爲憂瑾曰王先生居高位  
何自苦乃爾鏊求去瑾愈拂衆虞禍且不測鏊曰

吾義當去不去乃禍耳瑾使人百方伺之無所得  
且聞文贊盡絕乃笑曰過矣於是得謝事賜璽書  
乘傳歲夫月米以歸蓋異數也嘉靖初優詔存問  
卽賜餼羊上尊酒鑿上書勸德曰昔高宗學于古  
訓遜志時敏成王訪學于羣臣曰學有緝熙于光  
明夫人主一日萬幾固不暇如儒生學士日夜孜  
孜而帝王精一之傳治天下之大經大法古今治  
亂之迹天人精祲之際自非遜敏緝熙亦安望其  
有得哉國家經學之設盛矣而上下之情未親日講  
之規親矣而上下之分已謹 上有疑未之問也

下有見未之陳也獨尋行數墨爲章句文字而止  
矣是暴之之日少寒之之日多傳之之人寡咻之  
之人衆未見其能有益也昔漢光武雖在軍中投  
戈講藝息馬論道唐太宗延四方文學之士討論  
經籍或至夜分我太祖甫得天下開禮賢館與  
宋濂劉基章溢輩日講論其中其後聖學高明詔  
誥天下皆出睿翰今御製文集是也 仁宗臨御  
建弘文閣於思善門之右召文學之臣數人入直  
時至館中講論 孝宗經筵之外每觀永樂大典  
又嘗索太極圖西銘諸書於官中玩之夫古帝王

之學如此 祖宗之學如此 陛下睿哲自天春秋鼎盛講明聖學正其時也臣愚特望於便殿之側復弘文閣故事妙選天下文學道藝著聞者七八人更番入直內閣大臣一人領之如先朝楊溥故事 陛下萬幾有暇時造其中屏去法從從容訪問講經質史如日講之儀而加親焉上有疑必問下有見必陳將有日改月化不知其益而益者矣時御經筵以昭國家之盛典日造弘文以崇聖學之實功如是不已則聖德日新又新高宗成王不得專美於前矣臣聞易之泰曰上下交而其志

同否曰上下不交而天下無邦交則泰不交則否  
自古皆然而不交之弊未有若近世之甚者也國  
家常朝於奉天門未嘗一日廢可謂勤矣然堂陛  
懸絕威儀奕赫御史糾儀鴻臚舉不如法通政司  
引奏謝恩見辭惴惴而退 上何嘗問一事下何  
嘗進一言而何有於上下之交哉臣愚以爲欲上  
下之交莫若復古內朝之法蓋周之時有三朝庫  
門之外爲外朝詢大事在焉路門之外爲治朝日  
視朝在焉路門之內曰內朝亦曰燕朝玉藻曰君  
視朝退適路寢聽政蓋視朝而見羣臣所以正上



下之分聽政而適路寢所以通遠近之情漢制有  
中外朝唐有外朝正朝內朝宋制常朝文德殿五  
日一起居則於垂拱殿正旦冬至聖節稱賀則於  
大慶殿賜宴則紫宸集英侍從以下五日一人上  
殿謂之輪對必述時政利害於內殿引見亦三朝  
之遺意焉蓋天有三垣天子象之正朝象太微也  
外朝象天市也內朝象紫微也 國朝聖節正旦  
冬至大朝會則奉天殿卽古之正朝也常朝則奉  
天門卽古之外朝也而內朝獨缺非缺也華蓋謹  
身武英等殿非內朝之遺制乎洪武中如宋濂劉

基永樂以來如楊士奇楊榮輩日侍左右寔義夏  
原吉輩常奏對便殿蓋其事也今常朝之後人臣  
無復進見三殿高閼鮮或窺焉故上下之情壅而  
不通天下之弊由是而積 孝宗晚年屢召大臣  
於便殿議論政事將大有爲而民之無祿不覩至  
治天下至今爲恨惟 陛下遠法 聖祖近述

孝宗常朝之外卽文華武英倣古內朝之意大臣  
三日或五日一奉起居侍從臺諫各一人上殿輪  
對諸司請事與大臣面議而羣臣謝恩辭見之類  
皆得上殿陳奏虚心而問之和顏色而道之如此

人人得以自盡 陛下雖深居九重而天下之事  
燦然畢陳于前矣 上嘉納報聞自是時時召輔  
臣對平臺煖閣問學議政藹然君臣父子之盛實  
自鑒發之未幾卒贈太傅鑒平生寡嗜欲究心理  
性尚友千古高文清節守道見幾與人清不絕俗  
和不淆俗無少長賤貴咸慕欣欣然晚作明理克  
己二箴以進德砥行其論性善曰欲知性之善乎  
盍反而內觀乎寂然不動之中有至虛至靈者存  
焉湛兮非有也宵兮非無也當其時善且未形而  
惡有所謂惡者哉又惡有所謂善惡混者哉又惡

有所謂三品者哉天地間膈塞克滿皆氣也氣之靈性也人得氣以生而靈隨之故氣質者性所寓而亦性之所從蔽也氣質異而性隨之譬之珠然墜澄淵則明墜濁水則昏墜污泥則穢珠何異焉心者月之魄性者月之光情者光之發於物實始以虛靈爲性而新建伯王守仁大善之曰王公深造世未之能知後儒所未及也觀性善論可見矣又曰世所謂完人震澤先生近之矣

劉文肅公忠字司直河南陳留人性峻少通行方寡合一个不苟得成化弘治間國家無事翰林程李

輩能文詞好交游馳聲忠獨守重默惡人士趨競  
自處常過抗雖中貴人見力抑之官翰林二十有  
七年始以青宮恩進學士近習導武廟搖成憲  
忠太息曰吾講讀舊臣也疏戒逸游崇聖德忤  
旨陞南禮侍郎已進尚書尋改南吏部南京名吏  
隱多俛仰瓦合忠獨敦持規摹越閩黠吏竄名吏  
藉中詭冒官忠命四主事稽吏藉年經月緯究承  
代序所革罷凡千人庶僚滿秩署考必當實御史  
某恃勢橫人皆憚屈忠歎署下考焦芳顧知忠薦  
其賢五年瑾傳旨召入掌翰林比見大咈然業已

召改吏尚書兼翰林學士掌誥勅會瑾誅入閣是  
時張永幸用事又新有討寧夏談瑾功大臣改以  
事瑾者事永忠獨持介節不下守已申法永遣人  
來謁無加禮又却其餽在位不滿三月 上好游  
畋忠抑噎大息曰陳方就列不能者止吾何能覲  
顏負初心干清議乎十二疏乞休不允明年主會  
試考出院乞省墓 上忽摘錄中語大恚之予告  
歸家無餘貲杜門謝來往或勸之荅曰諛辭巧說  
不曾習學卑禮謠態不曾操演知者謂爲粗鄙不  
知者謂爲簡傲吾不能矣嘉靖初優詔存問陳謝

願緝聖學守

祖訓進忠抑邪開言路選將帥惜

賞賚罷土木於馭朽履水之義凜然又請時御文  
華召輔臣及九卿長貳若撫巡藩臬入朝者令直  
述所聞見各疏天下治行卓異者以聞無墮毀譽  
萃諸御屏而時拔之侃侃以史鰌尸諫自命已自  
撰墓誌戒勿請祭葬贈諡戒于誅輓而卒贈太保  
謚文肅崔文敏曰銑爲編修時見公公言古羈人  
匹夫當沅離困絕不取非義財况祿食者乎 鄒  
文成曰守益試南省受公知公賜告歸亟趨往別  
公握手語曰吾歸不復來矣子國器也善自愛寧

直無媚寧介無違寧恬無兢而許襄毅論當世人  
物謂後進生曰子初仕慎事大夫翰林惟司直一  
人正德初大臣任國事能制變者稱梁文康儲不  
顯言直諫而託辭恬主回天之力乃大過於諫  
善哉諫乎而楊新都事具帝紀中

裨史臣曰諺有之曰日中必昃方廷諍閣議時相  
有韓魏公者出空頭勅立斷諸閣可瓦解也乃濡  
忍而闔禍用成亦操刀不割矣迨諸公拔茅薦剡  
謝忠宣垂翼天腹而李相入左腹獲心文恪深造  
文肅勁正斯碩果不食哉文康當大節屹然新都



從容應變巨川攸濟救時之功登於鼎鉉矣

楊文襄公一清字應寧雲南安寧州人父徙巴陵已  
又徙丹徒八歲以奇童薦成化中進士官中書舍  
人文有名出提學山西改陝西力祛宿弊學政肅  
清創正學書院羣陝士高等者其中親課之呂柟  
康海李夢楊皆所取士也弘治中劉忠宣言馬政  
廢壞薦一清以副都御史督馬政召詣闕面受勅  
行明年并理茶馬鹽筴陝西人素信一清賢又官  
益高才益展條上茶鹽監牧事宜及易置馬吏奏  
上輒允牧事有成益開善水草地起城堡廬舍河

隍涼固間雲錦成羣會虜入花馬池塞勅經畧邊  
兼巡撫陝西時虜巨萬乘勝抵固原關中無人行  
一清方在平涼從數十騎馳至瓦停驛會總兵曹  
雄勸師雄大駭士卒震奮旌旗變色虜夜薄隆德  
我師火炮連發響應如數萬人虜疑大軍至駭散  
去於是劾罷總兵武安侯抑裁鎮守中官支應歲  
省數千金創平虜紅古二城以援固原瀕河築垣  
以捍靖虜虜自是不敢渡河正德元年改總制三  
邊一清以寧夏花馬池地要害虜數由以入沿邊  
行視得其要領上方畧四事曰綏土人處額地廣

召募溥賞賚爲著令已復經畧河套上六事事可  
績而閹禍作奪官語具邊防中五年安化王反瑾  
以事劇大擇中外大臣可抗難者閣學士李東陽  
曰非楊應寧莫能禦此難矣乃起一清總制而寘  
鎡已擒中悔之矯旨專巡撫實奪總制權而一清  
業以與監軍張永畫大策誅瑾矣瑾旣誅永力薦  
一清可大任加太子少保入戶部爲尚書疏急大  
本圖治安語具帝紀中六年改吏部中原盜起疏  
十事曰裕民曰增軍曰宥脇從曰聯伍保曰明賞  
曰嚴罰曰治退縮曰察蒙蔽曰禁奪功曰防奔突

江西盜未平薦按察副使吳廷舉可任宜委任責  
成渠魁劉七宿近圻要朝廷招撫廷議將從之一  
清曰中原百姓敢行稱亂罪在不赦宜易將增兵  
必殄滅乃已寇平加少保乾清宮災䟽五事拒諫  
一視朝太遲二祀郊廟太慢三創梵宇西內四調  
邊兵禁地禍萌大五 皇莊皇店織造皆害民言  
切直不報進吏尚書給事中王昂劾一清選法頗  
濫坐謫外一清䟽救御史孟洋劾內閣坐謫又䟽  
救鎮守太監誣奏巡按御史張璞劉天和王廷相  
逮下獄連䟽救十年兼武英殿大學士入內閣獎

拔士類練達機宜以災異自劾言近紀綱縱弛風俗傾頽用舍違宜官府異體賞濫刑僭讒言可以惑聖聰匹夫得以搖國是禁廷維介冑之夫京府無藩翰之託一切弊政至此而極是宜地震天鳴日食星變旱乾水溢之沴至沓來也臣覩顏在位將安用之爲錢寧等所啣避位去宸濠反上南巡幸其第游觀時左右有導上游西湖者婉辭譎諫事得止嘉靖初遣使存問尋起提督陝西軍已遂召入閣上憐其老朝朔望內官張錦奏請遷顯陵一清曰地道尚靜體魄宜安山陵定已

久不可動且大葬來 陛下自藩邸升爲 天子  
又吉壤不宜動動恐有他虞大獄讞上 上欲置  
馬祿死力救得戍邊初議大禮時一清家居獨是  
張永嘉言曰張生此論聖人復起不能易也故張  
桂力薦用及一清入朝乃首薦謝文正遷又時時  
爲 上言今日之務在省事不在多事在守法不  
在變法在安靜不在紛擾在寬簡不在煩苛皆時  
所深忌者 世廟成 章聖太后欲謁廟一清對  
今制無母后謁廟之文累朝亦無其事爲張桂所  
持時武定侯劬附大禮議爲驕橫一清諷御史趙

堂首劾勛奪後府團營已計去張桂霍侍郎曰議  
大禮者獨吾輩三伍人張桂去行及我矣急上疏  
列一清罪二十四事上立召永嘉還內閣俄朱  
繼宗獄起坐一清受張容金錢請永誌實與容世  
錦衣指揮上終憐一清大臣老不問已乃削籍  
明年疽發背卒二十七年繼孫元援詔請得贈太  
保諡文襄始上在潛邸時獻皇時時言吾楚  
有三傑兵部尚書大夏學士東陽與一清故恩禮  
終不衰一清生而隱宮類寺人學博才雄善機變  
濟務尤暢曉邊事羽檄旁午一夕十疏口占指授

悉中機宜及好汲引人人訾已顧揚薦之世往往以一清私門生故吏通路遺爲疑唐翰林順之曰世以多欲病公然孰知公廉介者故人餽寶珠千受之客方退分賜立盡門生有以貧歸者發囊助給率數十百金夫爲天下用財而不以私蓄卽比于一介不取可也羅修撰洪先曰世亦以尚通病公孰知其方介者先君賓其塾又門生爲武選八年出守郡不虞其抑也曰此地不可無此人又三轉脩兵徐州不虞其淹也曰此地不可無此人公卒先君承計泣連日曰公固愛我其忘抑與淹者



不以俗人視我也夫爲天下用人而不以私惠卽  
比于一介不通可矣唐言大然已濶如羅言信觀  
其深矣

石文隱公瑤直隸纂城人成化末入翰林爲檢討有  
文名爲李文正所知正德中歷南祭酒已召爲北  
祭酒端方介恪士類信嚮時浮逐競進瑤獨鯁狷  
有名 武宗未有嗣瑤疏請擇宗藩中親賢者育  
宮中代溫清蒸嘗不報 上始狩宣大疏請回鑾  
言六師不脩遠違法宮內無親近之託外有事變  
之虞臣子寒心幸望旋軫已百官相率諫南巡罷

不測䟽救甚切嘉靖初代王璽爲吏尚書時吏部  
黷亂者數年璽以孤貞行已意屬考察于清議者  
多黜登賢汰冗爲柄臣所不悅越兩月解吏部以  
尚書掌詹事府事五年大禮議起諸大臣繼去得  
召入爲文淵閣大學士尋加少保進武英時召對  
平臺煖閣而璽數數爲上言當清心省事法堯  
舜之恭已無爲用漢文之與民休息力行王道辨  
別忠邪中才皆可用之人無爲求脩平易有近民  
之實不必務奇治有端緒毋責效旦夕之間事可  
包荒勿刻意淵魚之察與天子意忤久之議廟

樂再議廟衢又議 章聖太后 皇后謁世廟守  
正議力爭 上見謂非通儒又三封還內批言  
太后 皇后出入正朝乃陰強陽弱之兆致仕去  
卒瑤沈默居政府不輕發言遇事所難徐出一二  
語輒中節清修無玷毀譽不撓始秉銓不說於新  
都已數議大禮乃不肯負新都自瑤去而吁咈之  
風益微矣方楊文襄柄國時王文成公守仁與書  
言自明公進秉機密天下士忻忻然動顏色相慶  
以謂太平可立致矣門下鄙生獨切內憂以爲猶  
甚難也亨屯傾否當今之時舍明公無可與望者

則明公固不得而逃其任然譬之萬斛之舵操之  
非一手則緩急折旋欲盡如已意斷有所不能臨  
事不得專操舟之權而僨事乃與同覆舟之辱此  
鄙生之所謂難也私竊計之惟身任天下之禍而  
後能操天下之權操天下之權而後能濟天下之  
急夫權者天下之大利大害小人竊之以成其惡  
君子用之以成其善固君子之不可一日去而小  
人之不可有者也古之君子洞物情之嚮背而握  
其幾察陰陽之消長而乘其運本之至誠以立其  
德植之善類以多其轉示之無不容之量以安其

情擴之以無所競之心以平其氣昭之以不可奪之節以端其向神之以不可測之機以懾其奸形之以必可賴之智以収其望坦然爲之下以上之退然爲之後以先之是以功蓋天下而莫之嫉善利萬物而莫之爭此皆明公之事素所蓄而有者惟在倉卒之際任天下之禍決起而操之耳夫身任天下之禍豈君子之得已哉旣當其任知天下之禍終不可得而免也故身任之身任之而後可以免於天下之禍小人不知禍之不可免而詭以求免卒之釀成大禍而已卒亦不能以自免故任

天下之禍者惟忠誠愛國之君子能之而小人不能也間與張桂書各勗以同寅協恭而語綰獻夫尤詳與綰書曰古之大臣豈盡其智謀才畧之足過人哉而論古之大臣不稱其智謀才畧惟謂之斷斷無他技休休如有容而已今天下事勢如沈疴積痼所望以起死回生實在於諸君如已私未療而何以療天下之疾幸默以此意相規切必克去已私真能以天地萬物爲一體而後可以康濟挽天下於三代之治而後爲不負 聖明之君報如是知遇也與獻夫書言 聖主聰明不世出諸

公既受不世之知安可不報圖其稱今日急務惟是培養君德端其志向於此有立固有政不足間人不足謫一正君而國定者然非真有體國之誠其心斷斷休休則亦徒事其名而已矣時不能用

稗史臣曰臣考觀 憲皇帝之世治極世豐孽牙

多有也而彭文憲商文毅之論讓善同危交賛於  
難難斯國脉所單厚哉 世廟中興勵精鼎革中  
外諸批政宿弊煥然又適五百年之期會而時賢  
猥巧文便辭導 上上軼千古獨聖內用權力相  
傾訖也故刑肅俗弊迄于今昔人所謂知出於爭

德蕩於名者非歟悲夫開三大釁國以滋救大哉  
乎禮讓之何有於國也

費宏字子充鉛山人弘治進士第一授翰林修撰累  
官至少師戶尚書大學士正德中地震宏疏請修  
實德謹天戒宸濠輦金帛賂權倖祈復護衛宏抗  
言曰寧王將不軌可假虎以翼耶持不可致仕去  
及濠叛誅賜鎡幣世廟嗣統召還疏慎始修德  
十事稱慈壽太后定大策功德最隆奉養宜從  
厚議徙慶庶人及正中官谷大用罪皆他人所不  
敢言已屢疏引疾歸上念舊德再徵入逾年以



郊祀執禮過勞一夕卒贈太保諡文憲宏三登元  
宰翊亮數世值主上好文諸御製多所潤色  
寵眷終老不衰

張文忠公孚敬温州永嘉人貌魁傑有大志舉於鄉  
數上禮部不第歸聚徒教授姚溪山中議論慷慨  
中窾所賦詩有宰相山中慎勿猜之語遂爲諸生  
祭酒卽遊監司守相間無能難之矣家居二十二  
年而中禮部試而天子南巡待明年世宗卽  
位始策進士賜第時上以興世子入繼大統下  
廷臣議所以尊崇獻皇帝后者久之不決公上

書畧言 上以興世子入繼 武皇帝統非繼嗣  
今以繼 武宗則弟也以繼 孝宗則孝宗自有  
子無爲繼且 獻帝惟 皇上一子柰何弗考而  
考孝宗使 獻帝有子而無子 上有父而無父  
哉 上心動迫轉臣禮官議報聞去爲南刑部主  
事連䟽上於是桂文襄公䟽亦上具如公指中外  
士大夫側目視二人且齷之矣 天子益心動而  
方獻夫霍韜輩益緣瑁說推言之 天子用以連  
柱轉臣禮官口凡三下詔始定議召瑁萼拜翰林  
院學士翰林院輒閉門不聽入而大學士經筵日

講纂修實錄令不與璉愈益發舒斥轉臣侵官以  
仇臣自爲心使臣有官守而不得盡其職 上愈  
益用之五年進詹事府詹事爲經筵講官又六年  
遷兵侍郎他兼官如故璉數與尚書論邊事持不  
下而執政英邊事欲屈其尚書又持之不卽抗疏  
聞 上輒伸其指然諛者欲 宗獻帝入太廟璉  
力詆其不可乃止太原妖人李福達以妖書惑衆  
黨至數千人爲亂撫山西都御史張潮勒兵討平  
之獨福達操重貲亡匿逮之急遂詭張寅名入京  
夜持萬金賂武定侯助壽爲關說都御史若御史

兩臺疏福達罪狀併劾勛倚掖廷親怙勢藏逆爲  
亂階疏三上不報勛因得流言宮闈謬爲張寅稱  
冤方議禮時衆訟共擯璵璥欲倣正統末衆廷斃  
馬順事甘心之二人者疾行候勛所而免立草疏  
勛以聞得夜召入定計勛以得幸至是 上疑御  
史實傾勛移張寅獄三法司法司論如錄 上大  
怒以爲黨屬璵璥二人反其獄遂命璵掌都察院  
賜二品服金帶方訊獄時璵憑天威以修睚眦至  
虜辱諸言官大臣獄旣反刻布其獄要頒天下以  
爲禮樂興而刑罰中云已遂以禮尚書兼文淵閣

大學士輔政仍領都察院賜敕諭俾約束中外御史所以褒獎之殊至當是時天下士大夫病髻髮指冠無不側目憤惋之者璉念以書生片言當人主意非久取相位思有以報効大要以破人臣之私交而離其黨一意奉公守法於是請考選御史請催取風憲官請申明憲綱請禁革貪風請諭三法司請禁約公私交接禁私書已請 諭內閣皆多所抉摘卽怨謫弗恤也尋賜銀圖書二一曰忠良貞一一曰繩愆糾繆得密疏言事七年加太子太保璉以上未有太子官不當設授少保 上享

太廟璵候道左目屬之賦詩以賜曰予喜荷天眷  
賚賢作邦珍再賜璘玉 上旣以尊崇 獻帝命  
錄前後諸臣議爲書而取衷於璵書成曰明倫大  
典進少傳兼太子太傳吏尚書謹身殿大學士予  
四代誥官一子是時楊文襄一清居首揆藩邸時  
業爲 上所知桂文襄萼亦起言禮入輔政金幸  
然不如璵深密問徃復月十數 上時時稱別號  
及字而不名一清老臣才望蓋天下中易璵而萼  
旣貴言事不能無相左已逐卻爲惡語交關 上  
前一清因以間八年八月二人者並致仕璵出京

一日上念之甚詔行人召入復相璉入而一清以霍學士韜論逐矣上怒甚欲逮一清于理璉力寬解而免上嘗諭璉言留都天下首地而事皆中貴人專之何悖也擇宗室一人留守便璉言高帝以親王領宗正不父而罷宗室不預政久矣幸上三思自是因數數言中貴人暴橫狀於是鎮守監鎗市船之類並裁革而應詔䟽審幾微專委任惜人才求民隱諸條上嘉納之時上以明聖述作爲已任而璉自言禮起事皆恣裁諸分祭天地南北郊爲朝日夕月壇於東西郊正先師號易像

而主 帝后行耕蠶禮錄開國諸勲後皆其大者  
已璵自以名爲 上嫌名請易之 上易名孚敬  
字茂恭手書賜之時夏文愍公言亦以言禮起驟  
當 上意於孚敬不盡合會雷震午門給事中良  
弼言公橫乃乞休歸無何復位進兼太子太師再  
乞休再召進少師時 昭聖皇太后於 上有推  
立恩而 上所生 章聖皇太后日重 昭聖猶  
以故事裁之不爲下 章聖懷快望 上不憚而  
昭聖弟昌國公鶴齡建昌侯延齡者早倖橫燕中所  
爲多不法旣微知 上指恐惴甚而燕中少年無



賴蠡起操其負爲持脅出金泉無笑其家奴張東  
山上變言其詛魘怨望大逆殺人事下詔獄皆罔  
誣獨延齡殺人頗有狀 昭聖急因上後宮有他  
變以延齡請 上顧益怒欲遂坐延齡反族其家  
孚敬以爲延齡殺人抵死固當而坐之反法不可  
夫延齡財虜耳何能反數詰問對如初乃止屬秋  
盡當論孚敬與大學士獻夫力疏言 昭聖太后  
春秋高卒聞延齡死能不內傷痛乎萬一不食有  
他故何以慰 敬皇帝在天之靈 上恚至謂曰  
古強臣令君非一今愛當死因令我哭當自悔不

悔從廷和耶廷和者初持考 敬皇帝相也而孚  
敬持不已乃下詔悉緩諸當論者而終孚敬與  
太后世延齡得長繫矣初潞州盜陳卿據青牟山  
殺官吏中外頗務姑息爲撫安計而孚敬力請破  
之信國威卒捕誅卿大同叛殺其將益自信薦劉源  
清邵永爲大帥以必得賊爲主而二本者不任帥  
大同卒挾北虜爲重攻圍不下尚書言侍郎以撫  
說進適於 上意合孚敬乃稍紕會又子遜忠天  
哭之慟以疾請 上勉留曰卿胡忍舍朕去耶得  
無以言故邑邑耶幸寬之孚敬抗辨不置請益力

上以厚眷之至手調藥以賜曰古有剪鬚和藥者吾  
手調亦庶幾焉其專精神加餐自愛以輔朕爲忠  
之大孚敬感泣疾益甚以死誓歸上知不可奪  
乃許致仕歲給八騶月俸八石所優崇禮加於他  
相明年上使錦衣帥視之疾促還朝孚敬行至  
處州稱疾作再起之至金華稱疾復作歸蓋又三  
年而卒上在承天聞之爲泣下贈太師諡文忠  
始天下迫於議禮誹之者十九已思其驟貴而刺  
之又十九及去位而是非之者半旣後相者率無  
能及每益下無敢與上爭事沒而思之者乃十

九矣王弼州曰公相而中涓勢絀至于今垂五十年士大夫得信其志於朝黔首得安寢於里者誰力也夫禮失而求之心而已矣後主所是爲令未有悖也考而不已則宗宗則入太廟入太廟則有祧卽公在難乎其免矣凡言禮而貴者其人材皆磊磊卽不言禮亦有以自見者哉

桂文襄公萼字子實饒州安仁人自幼學於其兄古山先生華師事胡敬齋先生門人張方先生言動一依於古而究心天下之務自天文地理禮樂名物農田水利以及於百家之書靡不貫綜舉正德

辛未進士兄華謂之曰吾斯之未能信可遽仕乎  
萼請給歸日與講求不失先王之意而可行於今  
者又六年始知丹徒縣忤其守拂衣歸薦起知武  
康又忤其守下獄盡心民事遭讒忤被折辱無怨  
悔登第十五年始稍遷南刑主事嘉靖初大禮議  
起柄國者本宋儒議尊大統而固兄華歎曰子不  
私其父非子也柰何牽制文義使  上意不少舒  
乎可疾議上調其衷不且有姦人乘其間者逢  
上心事敗矣萼於是議上與張文忠合議禮進爲  
廷議所共詆當  上意召爲詹事府詹事翰林學

士語具禮儀志中事稍間卽爲上言內閣乃輔導官任非其人則機務挫吏部猶銓衡然用非其人則賢否淆混請召致仕大學士謝遷復內閣致仕南吏尚書廖紀復吏部上頗好詩詞卽上言人主不可輕有所好宜澹然無欲穆然無爲無留心聲律爲邪臣所中而考求祖宗經國大典推行之陳十事預免六年田租恤逋逃一更登極初宿弊除欺蔽二嚴登聞鼓禁約通冤抑三禁運司解銀復邊糧四革奸徒阻絕養濟院收養無告及帛支院糧五聽收游食開墾城垣墾地六免赴部

考滿謹曠官七憫窮吏罰班八申聖敬九廣聖孝  
十也遷禮右侍郎會選 公主婚限一月內選子  
弟夢上言大緩固生奸太速亦不達乞稍寬三四  
月精選以重婚時 上諭內閣令講官及翰林官  
日輪一員將經史有關君德國政者直書備覽有  
疑則問已改旬三十八日夢疏言 皇上此心卽堯  
舜清問好問之心我 太祖太宗仁宣英宗俱嘗  
舉行者也經筵日講已有定規寒暑暫停亦仍舊  
例但堂陛九重咫尺千里雖有善言亦何自上聞  
皇上當修省之餘動咨訪之念欲令儒臣日直此開

壅蔽攬乾綱第一義也上意所及時有召問則必有超然之思視預爲限日專事講說者裨益相去萬萬也昔人有言見人主者夢日不夢竈以日兼燭天下人不可蔽竈之光一人煬焉非人君之象故也令必以內閣二人同直有問必顧忌而不敢正對切謂五日輪二人者終不及聖諭日輪一人之善也已上五事疏言民壯之額度不必常設地方摧折身錢量減三分之一聽爲附近災傷地方頂補里甲官銀一官厨缺部隨收補免天下清解二天下子弟入監讀書有祖父母父母年老欲歸



省者聽給假一年踰半年實在御前上直將軍  
有祖父母父母年老欲歸省者分番放省六月不  
下百餘人已䟽修明學政遷吏部尚書䟽足國安  
民進禹貢圖已進輿地圖皆經國大務語具方域  
學校土田志中薦刑侍郎劉麟堪工尚書論保傳  
之職請珍攝八年旱災傷請蠲民田租語甚急  
旨未下復請上曰待禮部類奏災異章上下矣  
憂念災傷重謂禮部尚書方獻夫曰上憂勞小民  
極矣災傷䟽宜速上法徵民田租以十月開倉脫  
皇上有曠蕩之恩及九月十五前則民受實惠少緩

之卽爲具文所謂黃紙蠲租而白紙已先收者也  
已論郡臣薦舉論申明考察論革冗官皆任官大  
務方張桂召入議禮時羣臣謹欲倣馬順故事於  
左順門衆拳之死無罪也張桂走武定侯勛家而  
免從武定家上書得召見而羣臣摘貴勛以二人  
故結上心益橫放毒中官張永血流死萼密疏  
上駕出郊毋令扈以預防上手札言勛素忠亦卿  
所素知何云云也萼乃具疏其兇暴不可倚信者  
數事以上而具言張霍庇勛之情已絀而張霍之  
橫遂深無何召入閣爲武英殿大學士兼官如故

始萼從兄華講宋學甚久諸論奏聖王心學論皇  
極論易復卦禮月令論擴充四端論養德養身皆  
正學以言知社稷生民爲重 首疏請優恤四鎮  
請免民田租而拳拳於生民務保惠安全尤深其  
言曰 高皇帝取民之制經之版圖理之以政事  
至纖至悉然法久廢墜人不盡知遂致經理失宜  
賦稅偏重宜分豁災傷田租分豁里甲官銀薦大  
理少卿魏校講經傳深密有師法請召爲日講官  
卒贈太傅諡文襄 胡莊肅公松曰余行部往來  
安仁過故相桂文襄公里問其遺言往事叅以他

日睹記蓋泫然悲焉嗟夫世人貴耳賤目智既不  
足以知人情又蔽於先入亦何惑乎賢哲之蒙猜  
詆也其大節在讀書好古篤信躬行孝友介特甘  
貧尚志以賢聖行業爲己任跡其執禮守正不諂  
不回三爲令尹數被折辱而曾弗悔易也至遭被  
知遇日夜敷納罄竭忠慮大者如專聖學明聖敬  
疏其希天之學於學忱識其遠且大矣旣深於其  
本卽如輿地圖叙論兵樞民政戎索海防鹺法儲  
要備殫心力也使當時百執事有味乎其言交相  
修飾屢省力行於巖廊之上至使主上憂勞南

北赤子若此耶世徒見公由主事不數年致位公  
孤遂見媚嫉譁然攻之亦過矣今之世有官爲太  
宰身都上相而野無腹畝家乏百金蕭然敝宅澹  
然如爲令尹時耶或又謂公嘗排王先生伯安之  
學殆於媚忌竊以爲不然蓋陽明兩廣之役寔由  
公薦謂一時天下之才無出陽明之右者此天下  
之公心其後乃至訶禁操切自其意見識趣之不  
同爲金時在位所誤則有之所謂晏嬰不知仲尼  
命也晏嬰雖不知仲尼而節儉正直能以其君顯  
於天下可以一眚病耶

卷之十八終

皇明書卷之十九

新城草野臣鄧元錫錄

名臣上

陶叅政安字主敬太平當塗人少博綜有大志元季  
隱山長爲時宿儒上定太平卽下令不殺百姓  
案堵安與耆儒李習等偕出迎安見上狀貌喜  
謂父老子弟曰龍姿鳳質非異人比生民今有主  
矣上召安詢時事安因對曰今四海鼎沸豪傑  
爭於戰攻然志獨子女玉帛無撥亂安天下心公  
率衆渡江神武不殺以此吊伐天下不足定也

上大悅因與定取金陵之畫命以左司郎中贊機  
務禮遇甚厚事每咨訪焉旣而 上得劉宋章葉  
四公召問安夫四人者何如對曰皆天下才也臣  
與之語謀略不如基學問不如濂政事不如溢琛  
敢賀 上得人出知黃州尋移知饒州所至寬賦  
省徭招流亡民大悅時方征伐百用急安勤撫諭  
民勸輸而軍不乏興乙巳信州盜攻饒城安與千  
戶宋炳率吏民城守選勇卒遊徼晝夜捍禦登城  
諭賊賊叩頭城下曰使官皆如太守民豈有今日  
然事已如此勢不得復還但城破不敢相害耳會

援兵至而難解諸將請盡屠諸從賊者安曰民爲賊迫脇非本心柰何殺之所全活甚衆吳元年初置翰林召入爲學士知制誥修國史召諸儒議集禮爲總裁定律爲議律官恩眷殊特嘗賜門帖云國朝謀略無雙士翰苑文章第一家蓋褒異如此上嘗問學術安對曰道之不明邪說害之也邪說害道猶美色眩目自非豪傑鮮不爲所惑夫邪說不去則正道不興天下何從而治上太息稱善御史有言安隱過者上曰朕素知安必不爲爾爾何從得此言對曰聞之道路上怒曰御史取道各



言毀譽人豈不傷賢善乎黜御史罷之後置行省  
出爲江西行中書省叅政加慰諭而遣安寬仁達  
吏事政績大著居四年卒疾劇猶草上時務十二  
事贈姑孰郡公國初大祀禮專用安議袷禘禮定  
於詹同齋戒禮朱升五祀禮崔亮朝會禮劉基祝  
祭禮魏觀軍禮陶凱然大都多安所裁定云

御史中丞章三益者處龍泉人也名溢始生音如洪  
鐘少長端重如成人長肆力於學元季兵起與從  
子存仁俱避兵山寺已存仁爲寇所執溢心計曰  
吾兄止一息不可使無後挺身出曰兒幼無所知

我願代之賊素聞溢名方出重購以求及得之大  
喜邀上坐問計溢正色拒之曰君等皆有父母妻  
子柰何爲此赤族事耶賊怒繫之柱以刀磨其背  
曰不降且死公曰人情固貪生然爲不義屈非久  
且滅族柰何吾不忍爲也賊愈怒恐刼之溢曰死  
卽死何恐爲賊壯而釋之於是夜給守者乃得脫  
集里民爲兵旬日擊却之未幾元將石抹宜孫將  
軍至欲盡誅處民誑誤者溢走麾下說之曰將軍  
知賊之由乎曰不知也溢曰貧民迫饑寒無控訴  
故相挺而從賊誠得一循吏招集盜卽一窮兒耳

今盡屠剪之是揚湯止沸也將軍曰善乃下令止殺而留溢計軍事上平盜功授龍泉簿不受頃之石抹將軍守台城被圍急溢時歸田里起奮曰吾邦非石將軍人之益枯骨矣今有急乃吾報德之秋也集趨勇赴難竟破賊省府又上其功除武德將軍僉浙東都元帥府事溢太息曰吾所將皆鄉里子弟今子弟肝腦塗地良苦甚衆而吾獨成功名吾不忍爲也辭不受於是歸結廬匡山中讀書而屬其子障鄉里毋懈及王師克處州乃與宋劉葉同應聘擢主營田事顧日夜念將毋以 上眷之

厚不得歸或以聞上 上卽命歸省賜白金文綺  
已擢爲浙按察司僉事改湖廣溢以荆襄多廢地  
可田議分兵屯田控中原浙東按察使被逮辭連  
溢溢憂懼甚 上遣太史令基諭之曰予素知溢  
守法毋疑也會總制胡深以兵入閩敗沒處境皆  
動搖 上亟命溢以副使往鎮溢頓首曰臣前任  
浙東無狀同列皆獲罪蒙恩獨原若更擢是益重  
臣罪也疆場之事臣死不敢避獨新命敢辭 上  
察其誠至許之溢至誅其首亂者而撫靖其民人  
召舊所部義兵據要害列木柵爲屯氣勢相羅絡

境內帖然浦城軍乏興行者欲運處州糧以餉之  
溢以爲處州浦城舟車不通難猝運卽運不能濟  
而軍中所掠糧甚夥請拘入官而均給之處州造  
海舟若干艘食水軍隸軍府役繁而事擾乃奏設  
水軍千戶所專統之溢長子存道初以元帥戍浦  
城及是有旨命提兵爲遊擊而溢卽處城坐鎮  
之上言父子相統非法意請罷存道官不許而溫  
州茗洋盜爲患溢卽檄存道討平之海隅底寧請  
入朝上報曰吾知卿在邊城良苦俟平當卽召  
卿及吳平果召旣入見上獎諭甚至謂羣臣曰

章溢雖儒臣然父子宣力一方功不在諸將後溢謝不敢當時軍興處艱額視承平且十倍溢言之丞相丞相入言之上上曰吾勞處民久矣詔從其初上既卽位召溢與劉基同入見上歷陳其功伐僉拜御史中丞兼太子贊善大夫且諭曰二先生年向耄恐感霜露毋爲早趨朝也時言官多伺上意爲操切溢獨存大體或頗以爲言溢曰憲臺儀表百司居其職者當養人廉恥使避而不犯豈但以搏擊爲能哉上祀社稷大風雨還坐外朝怒禮官議禮不合致天變欲殺之溢進曰

風雨已連朝無足恠卽禮官議未盡 皇上誠敬

自足昭格願賜寬貸 上爲之霽威先是 上旣

從溢議命李將軍文忠由浦入閩詔存道部鄉兵  
萬五千以從閩平而存道兵有詔從海道北伐溢  
請曰鄉兵本農民安知兵始令征閩許事平歸農  
今閩平復調是失信於民也不可 上默不應溢

徐進曰平閩兵不可調今獨藉昔嘗從盜者使爲  
軍令存道將以北伐俾自贖則恩威著矣 上大

悅曰孰謂儒生迂今如先生言通達事理不迂也  
然非先生無能爲朕任此事者溢受詔卽行比還

處母夫人已沒上章乞丁憂不允而丞相李韓公復貽書道 上眷倚之意乃遣存厚還家而灑泣治戎兵旣集命存道部領由永嘉浮海北行已而再上章乞終制乃許溢傷母終不獲侍居常忽忽若無以自容及營宅兆親負土石而病子女見其羸憊皆泣溢曰勿憂也吾父母幸已安厝祖宗丘墓幸粗飾歲時薦饗幸有條吾庶幾無憾獨幸荷國恩未報耳卒 上甚憫悼製文遣祭焉溢篤於孝友父母未塋而盜焚里閭溢顙天稽顙哭火至柩所而滅事母夫人極孝養二兄別居已久旣創



第龍淵請三兄同居以奉母怡怡如也定先世祭  
享之禮而益田以供祀創義塾立義阡諸可以聳  
善扶義者無不爲也器局夷曠而撫世酬物一本  
於誠外若和緩至其臨大事爭是非不避權勢必  
折衷於理嘗言曰古之學主躬行故章句之習一  
不以屑意而人倫日用關世教者恒切切焉宋學  
士有言生我者父母知我者惟公其相信如此子  
存道征和陽竟死事云

宋祭酒訥字仲敏滑人也少閑家訓卽矩矱自檢不  
妄言笑稍長問學該博有造詣元季舉進士以時

驛騷卽退居自晦洪武中徵詣公車召對稱旨除  
國子助教橫經發難擊節發蒙從學者如客得歸  
嘗應制撰敕文渾雅古健稱上意超授翰林學  
士是冬進文淵閣大學士日有補拾寒附火而假  
寐火燎脇下永傷膚上警之曰脇者協也聞火  
焚汝脇將非汝居內相不能協人主爲政神怒耶  
女必戒之訥頓首謝時初開太學學政未設而官  
太學者多選悞至師生相訐教尼不行乃命輟閣  
事遷祭酒上自製誥詞至以尚父典周八百儼  
之訥感奮立標準篤恩義身教言法鏗礪無遺力

大被賞遇眷禮隆厚語具學政事中始訥自受命  
卽寢食學廂不復宿於家及被病其子託監屬僚  
以請盍休沐厲聲曰是何風雲氣少兒女情多况  
在丁社齋戒中耶迨祭訖歸就第遂卒語不及家  
時年八十矣 上操文再祭給喪塋費津遣還鄉  
唐宮保鐸直隸鳳陽人重厚慎密又廉靖不苟取

上初起兵時卽侍左右累官兵刑二部尚書太子  
少保時諸卿中詹微以才勝鐸以德勝微務斷訐  
吏髮蓬面垢超事如羈囚而鐸不動聲色政務修  
理人愛而懷之 上嘗言鐸始友及臣今三十四

載交不知變色口不出惡聲數坐黨事 上信鐸  
篤行皆不問卒年六十九卹贈最優

劉司業崧江西泰和人賦性純厚至正末舉鄉試得  
報適自山中摘栗歸悵然涕下曰柰二親何會天  
下亂避地者屢歲洪武中以經明行修薦拜職方  
郎中小心謹畏屢奉使稱旨遷北平按察司副使  
時嘗新造政務寬厚存大體考覈屬吏以廉慎爲  
先小人險狡者輒先事制防其讞獄以情求生不  
得已乃寘之法招徠逋逃慰安反側興學校厚風  
俗溫顏巽辭而風采不可犯坐事輸作京師歸

十三年徵拜禮侍郎攝吏尚書尋以災異免已復  
徵拜國子司業賜鞍馬得朝夕繼見 燕語必移  
時無何病猶強坐訓諸生及輩人問所欲言慨然  
曰天子遣崧教國子將責以成人才乃遽死乎無  
一語及家命有司治斂具 上諭祭褒以爲有學  
有行云崧性廉慎所居室爨半覆以茅曰令後世  
賢師吾儉田僅數畝皆授館時所置迨貴未嘗增  
居官十一載未嘗以家累自隨按察北平獨携一  
童子俱往至復遣還每夜孤燈一榻讀書不輟迨  
五鼓卽起蒞事歸田日謙下退抑問學彌篤與人

言未嘗及官政文雅澹詩有唐人風

陶尚書凱浙江臨海人有高才學博能文章初遊吳  
楚文多慷慨中更亂離去居深山中授經養親文  
多隱約 國初應聘起修元史選授 太子書除  
翰林院應奉文字三年超拜禮部尚書凡稽古禮  
文之事多所論定而詔令封冊歌頌碑碣時時命  
撰著文章遂盛傳於時建奉先殿於乾清宮左令  
起居注記言動令臺省府置銅匱簿錄時政皆凱  
所建白也後出爲湖廣叅政致仕召爲國子祭酒  
尋老自稱耐久道人 上聞之怒竟坐罪初牛諒

楊訓文與凱俱禮部同尚書蓋部三尚書初設六部時首擢訓文爲起居注滕毅爲吏部尚書召見面諭之盡職而郁戶部新直隸臨淮人守尚書十三年綜理甚密而取於民有節上嘗問天下戶口田賦地里險易計數響荅無遺謬永樂初乃卒楊刑部靖高朗有應卒才嘗逮一武官將卽訊門卒檢其身得大珠一以前僚屬方愕貽靖曰珠安得許大必僞也命立碎之以聞上嘉歎曰千金之珠卒然至前略不動心而碎之免意外生事端於才智兼之矣時開刑部濟洛陽人敏慧有才辨凡

國家經制衆莫能裁定者經濟畫卽條章具備可爲後世式

曾侍郎魯江西新淦人年七歲能暗誦九經稍長取三史日記之數千年國體治亂人才忠佞制度沿革咸纒纒如引珠也家藏子集數百家各掇其菁華爲文音麗蔚有不可奪之氣年十九謁虞文靖公于臨川益潛心宋四子之學久之克然有得也元季亂州縣騷驛魯召里諸豪陳禍福集健兒約誠爲保障一方晏然人號曰君子鄉洪武初召募修元史遣使者起家續修功最訖事乞還山會開



局編類禮書以衆議堅留禮家故糾結難議羣言  
沸騰中魯獨揚言某禮宜據某言爲是從某說非  
是按據精博衆莫能難心厭而去授儀曹主事常  
忠武王薨高麗遣使來吊祭魯索其文觀外襲以  
金龍帕內不署洪武紀年質責之曰龍帕固疑誤  
用若納貢稱藩而不奉正朔君臣之義安在耶使  
者頓首謝易乃已安南來貢主客已受章將入見  
魯取其副覽之乃國王陳叔明也乃言曰前王陳  
曰煙今驟易名者何白尚書詰之使者不敢隱遂  
得其篡奪狀其使也蓋覘也上聞曰島夷何敢狡

猶如此却其貢不受又之上問丞相魯在部今何  
官對曰主事爾卽日超六階拜侍郎膏露降鍾山  
譔賦上羣臣咸有作 上獨奇其文曰此曾魯作  
耶援據精舖敘有法新進生不及也無何得疾卒  
魯蓄德熙和不見有忿戾之色接人退然若不勝  
衣孝友甚備喜周人之急四方賓客至門倒屣迎  
致無倦容其從仕精白一心知無不爲時國初太  
典禮制度多經損益而後定嚴陵徐尊生有言京  
師有博學之士二人一以舌爲筆一以筆爲舌蓋  
指魯與宋學士也宋學士曰尊生過矣我何敢望

曾公蓋爲時推服如此

吳學士伯宗江西金谿人溫厚渾雅能文章洪武四年始開科舉舉進士第一人擢禮部員外郎胡丞相惟庸方用事欲人附已伯宗剛直不肯屈惟庸中以法謫居鳳陽伯宗乃上書論時政極言惟庸專恣不法不宜獨在中書恐恣久爲國患辭甚愷切上得之卽召還賜衣鈔使安南還爲國子助教進講東宮陳正心誠意之說改翰林典籍應制賦十詩援筆立就上嘆其才賜織金錦衣十四年除大常寺丞辭明年改國子司業又辭忤旨

貶金縣學教諭召還翰林爲檢討十五年爲武英閣大學士明年第知縣仲宴謬薦人復坐還檢討明年卒時豐城朱學士善字備萬元亂奉繼母避亂山中力供養而讀書不輟以郡學教授舉廷試第一爲翰林修撰奏對失旨放遼東久之召待詔翰林尋陞文淵閣大學士以疾乞骸歸卒 上嘗諭善曰人君能以天下之好惡爲好惡則公以天下之智識爲智識則明又曰人之常情多矜已能好言人過君子則不然揚人之善不矜已之善貸人之過不貸已之過又曰萬事不可以耳目察惟

虛心以應之萬方不可以智力服惟誠心以待之  
善頓首稱善

劉三吾湖廣茶陵人初避兵廣西天下平還以通政  
使茹璫薦徵至都老矣應對詳慎上喜授春坊  
贊善上嘗問侍臣今天下民生頗安否皆對曰  
賴陛下威德歲比登安矣上曰天下民生至  
衆豈能保皆安朕爲天下主恐民生失所心未嘗  
一日忘也三吾曰聖心拳拳如此宜恩德之下於  
民也御注洪範書成上謂三吾曰朕覽洪範一  
書敘彛倫立皇極保萬民敘四時成百穀本於天

驗於人事真帝王爲治之要道也箕子爲武王陳  
之武王猶自謙曰五帝之道我未能焉朕每爲惕  
然遂疏其旨朝夕省覽三吾頓首贊上明聖道  
福下民此萬世厚幸三吾博學有恭德上每與  
之言未嘗不疊疊於本仁行恕愛民任賢也三吾  
將順啓沃愈益力蒙禮賜愈厚三十年命主會試  
考比試偶黜北人竟獲罪三吾爲人慷慨坦夷不  
設城府自號坦坦翁至大節屹乎不可奪也上  
嘗欲易太子公痛哭曰太子天下本欲易之置秦  
晉二王於何地忤旨降博士已又贊立皇太孫鳴

呼正矣

徐屋字宗實浙黃巖人少敏好學從永嘉彭廷堅遊學益充元亂教授鄉閭若將終身洪武中應召被顧問稱旨敕銓曹與風紀官辭授主銅陵簿請迎母就養上怒謫輸役淮陰驛會選駙馬都尉功臣子胡觀入選詔擇師教之召屋至授館約教峻明如在鄉塾時觀旣入府成禮中使援授他府例設駙馬位堂中北牖南面而置師位西階上東面屋奮然曰師嚴然後道尊豈以我一布衣故詘師道哉手引駙馬位使下然後爲說書他日位如

前則拂袖出爲書稱引三事大義及富貴驕人之  
說責之觀媿謝執弟子禮而綺紈之習脫然高  
祖大善之召獎諭再三判蘇州府奏發米二十萬  
賑饑春水溢巡行原隰興役築治之採訪使以爲  
歲歛妨農勒令止屋曰他役固妨農水不防則田  
不可耕妨農孰甚焉今獨令有田家準田多寡各  
募人爲役豈爲病饑者哉竟不爲止以課最超兵  
部侍郎首陳十事摘時弊決廷議不阿遷尚寶丞  
靖難後乃老尋以累逮至京疾卒

熊鼎字伯穎江西臨川人方正有節操元季爲山長



玄端深衣據席說經課諸生學不廢亂益熾賴郡  
帥延鼎問守禦方略鼎悉意經畫而一主於救民  
及寧河王鄧愈帥師下江西聞鼎賢下令徧求之  
鼎起詣軍門揖見王王致之帳中日夜咨訪一軍  
皆歡以爲主將得軍師也 上幸豫章召見慰勞  
尋官起居注 上精求禮樂之事召學士朱升等  
陳樂器於庭 上擊磬命升辨五音升對忤旨  
上大怒欲寘之法鼎從容論解 上曰升每謂審  
音顧不辨宮徵何也鼎對曰石音難辨蓋自古而  
然唐虞惟后稷能和磬聲書曰於予擊石拊石百

獸率舞

上曰卽如是任監儒治樂樂何由和鼎

具言樂之和由人所致人君能致中和則萬物和  
萬物和而樂音和矣 上怒乃解升旣出謝曰非  
君吾殆矣 上以廣信所上茶稅失實怒時新行  
赦趣中書遣御史往廉狀鼎與給事尹正諫曰朝  
廷新立將布大信於四方而御史憲實也今肆赦  
後以細故煩御史按事失信且棄國威 上良久  
曰止追御史毋往浙西水不可運陸輸京師率五  
石而致一石鼎叩首爭曰 國家都金陵以浙西  
爲根本而困之非計也且農作方興而使其僕僕

道路一夫不耕害不淺矣 上悅爲罷令擢浙按

察僉事台溫方氏竊據而來人道乖戾鼎按其豪猾六百餘戶悉屏之遠方平陽州吏目貪坐罪首州守與佐僉相構爲姦遣鼎訊而州民數百遮使者爭知州鎰無罪時方重故出之法鼎進民再詢辭不變則歎曰法以誅有罪也吾豈可身畏譴而戮無罪人乎具以情白 上釋鎰不問始久旱鼎行部輒雨民曰此熊使君雨也是年秋始立山東按察司以前階改山東治濟南濟南故有廉訪司廳事壯臺檄鼎居之汪丞相以叅政建行省其中

僚吏請以臺檄白復之。昂曰：「官在政事，何如？」豈顧以公署爲麗耶？儻城北痺陋室以居，日侃侃治事。其中汪廣洋聞之，戒其屬曰：「此真憲官，慎無犯時。」河南北甫定，重兵宿濟南，頗暴侵民。有偏將受部兵一繒者，輒逮訊諸將，大駭。明日出之庭，數以黷貨罪。准律贖金，諸將又大喜。由是莫敢恣州縣吏多不職，昂陰風迹數十輩，論如法。而以齊魯民愿樣一以靜重鎮之。令郡若縣各置二籍：日簿所治諸獄訟、賊贖，一留治。一上憲司，月按籍而鈎考之。後爲武三年，封建諸王，驛召拜晉王，傳坐免，尋召。

除晉王府叅軍以尚書授王宋學士濂薦鼎於書  
最深詔爲皇太子說書明年上御文華殿召鼎  
問曰秦漢來諸侯王不肖者幾何鼎謝未考遂命  
之蘇州按獄還復問如前鼎復謝未考改刑部主  
事奪叅軍所受俸八年授岐寧衛經歷賜金以行  
復念在邊良苦手詔慰問有狐裘纈袍毳襪之賜  
鼎上書言西涼岐寧本漢唐內地不可棄朶兒只  
把非有歸向之誠特假中書威重以刼服其他種  
今急之必席捲遁雖得地而無民緩之則羽翼成  
而跋扈難制宜稍給種糧撫其遺民而以良將參

守之便 上喜曰人謂熊鼎迂不迂也徵還次西

涼爲朶兒只所賊而卒 上感悼遣使吊祠焉

董侍郎倫山東東昌人元末徵不仕洪武中辟爲春坊贊善事 懿文皇太子所陳說務依于忠厚出

爲江西左叅議盡心民事名退食堂曰後樂草封事數千言上稱旨以誥誤謫教滇南至成都蜀獻王禮敬留彌月乃聽行至滇用夏變夷士知嚮方建文初 天子眷舊學召拜禮侍郎兼翰林學士與方孝孺入內閣侍學是年秋御書怡老堂及鬆几玉鳩杖以賜主會試得楊溥胡濙後皆爲名卿

時解縉謫河州倫爲言縉絕世才得召還其知人  
善汲引類如此尋卒 上悼惜恤贈優厚倫質直  
敦良有文學爲時所重濟時匡君之念老而彌篤  
從容清禁壽考令終不與遜國之難亦天所獨全  
云洪武時六卿中賢者兵尚書鳳陽單安仁以義  
旅從以按察副使巡浙東悍將橫卒不敢苛賦  
虐細民猾賊民不得以詆誣傷良吏以中書左司  
郎佐丞相理庶務剗劇焚如易以將作卿董營城  
闕宮殿事立辦改兵部而老賜田三千畝牛七十  
角給尚書半俸終其身戶尚書吳人郁新以處文

主事得賜名以比部郎超授戶侍考滿擢尚書新  
有雋才能好善每奏事庭中上顧問天下戶口  
漕運地里險易計數時日響答無遺謬嘗自謂劉  
晏而下不論也晚多疾時在告上甚憐之永樂  
初以恩禮終

劉亨江西廬陵人洪武初以賢人君子徵辭已又舉  
經明行修乃至陳古今政治之要上嘉之命進  
講華蓋殿忤執政意出爲壽州訓導尋上書言六  
卿秩當與軍府埒國子祭酒不當在太僕卿下又  
言將臣子弟生長富貴習驕侈異日卽授官無所



用宜立武學教訓使知禮義以變其習陞常州武  
進丞廉勤有善政修學校躬勸學表民之有行誼  
者以風作旌善坊再思亭以勉已勵俗百姓間弦  
歌相聞 上賜璽書褒焉惡少率衆亂白郡守毋  
令滋蔓擒首惡而解散其黨居無何罷歸屢薦不  
復起宣德中監察御史尹崇高力薦請以爲國子  
師時已八十矣辭 上召見諭曰伏生九十尚傳  
經况八十乎亨辭益力 上乃曰老者安之允其  
請而歸深衣幅巾日左右圖史踣道秉禮終老不  
衰怠云

稗史臣曰聞之 高皇帝以武功創業顧慕用耆  
儒見耆儒輒喜以耆儒無誕譎可厚俗也至鷹擊  
豪猾剗治汙染率倚幹敏敢任之賢竭才力赴功  
然非久什已故是時天下儒多質行長厚無綺言  
記曰春者蠢也春者物之始生也國之始基運也  
如春嗚呼豈非天哉

桂長史彥良浙慈谿人也學行純固方國珍連甌越  
辟之謝不就國初被薦召爲太子正字入侍大本  
堂言必稱孔孟以明聖學格君心爲務 上從容  
諮以治道彥良對曰道在正心心不正則好惡頗

好惡頗則賞罰辟賞罰辟則太平未有期也故君  
人者惟忿忿是務去 上曰善時 上懲元以寬  
縱失天下用重典峻深謂彥良曰法數行而民犯  
且柰何彥良對曰用德則逸用法則勞法以靖民  
故民勞而弗靖誠德以靖民則民靖於德矣 上  
曰善他日彥良侍 上問卿何官對曰待罪太子  
正字 上曰不然卿帝者師也又一日謂之曰今  
江南大儒惟卿一人彥良頓首主臣臣何敢當宋  
濂創基 上曰濂文人耳基峻隘不足取殆不如  
卿已遷晉王府長史居久之致仕條太平治要十

二策以上一曰法天道天不言而時行物生君奉  
天而統六合當仰法於天明並日月恩如雨露威  
比雷霆信如四時蓋百職効勞而庶務自理也苟  
身兼庶獄庶慎則君勞臣逸非所以法天矣夫天  
道好生聖人法之亦好生好生之德洽於人心故  
人皆化於善而不罹於法孔子曰惟天爲大惟堯  
則之法天之謂也二曰廣地利中原爲天下腹心  
膏腴之地今荒蕪日久 陛下幸加惠下令令諸  
郡屯種而懇闢未廣臣以爲莫若于四方地瘠民  
貧戶口衆多之處募民往耕願應者資以物力寬

其繇令樂於趨事及犯罪者亦謫之屯耕盡中州  
荒閑之田無不農桑數年之後民物殷富財恒足  
矣三曰順人心言當順其欲四曰養聖德夫聰明  
睿智主乃天生聖人文武仁義之德莫不具備惟  
萬幾日感意念橫生如重翳之蔽白日得養者或  
鮮矣故雖大臣必兢兢戒謹加存省密察之功節  
其慾懲其忿怒俾清明在躬則猶青天白日重昏  
擴然志氣如神必得其壽此養之之道也五曰培  
國脉夫三代之所以曆祚延長者以仁義道德教化  
其民不專之於刑罰故民遂其生養太和薰洽而

天命從佑饗也秦隋則不然仁義不施專肆苛刻  
力役不休乃民不聊生而天不佑之矣今功成治  
定萬邦悉臣惟 陛下以三代有道之長爲法秦  
隋之失爲戒六開經筵言宜延擇老臣名儒日講  
經書以資啓助七精選舉言官得其人則庶務理  
而萬民樂選舉之際誠重誠慎六部十三省布政  
司乃股肱重任豈可忽然而用又忽然而輕廢之  
哉必歷試其才能德量可當此者然後以任毋苟  
脩官其提刑按察及知府固難周知宜令京官五  
品以上各舉賢良方正一人以充知州知縣於民

最親令按察使及知府歲貢廉勤淳厚之賢不限  
以已仕未仕而慎其賞罰則人皆悉心求賢而野  
無遺才矣其新進人士且當試以佐貳之職而隨  
加甄擢八慎刑罰致欽恤民命之意九敦教化言  
今大興學校廣生員所爲教者必先德行而後文  
藝抑浮華而尚淳篤宜未可驟用長天下奔兢之  
心十馭戎狄言守備爲先薄伐次之啓釁貪利如  
漢武秦隋焉斯下矣今海內旣平車書混一北狄  
遺虜當選將練兵分屯防鎮伺釁而動蠻夷朝貢  
間有未順者獨當修文德以來之無勞勤兵十一

蒐才俊言古之俊才或隱於屠釣或出於版築  
出於亡命皆足以興邦而名世宜令有司博舉薦  
以聞十二廣諮訪昔舜好問好察明目達聰故能  
以天下善爲己善而雍明成化今萬化統一正逃  
視遐聽之時宜令常朝百官得關輪對布政按察  
府州縣官入覲之時令敷奏以言觀其賢否凡時  
政得失民瘼吏治許令諸人陳聞古有納言之官  
專掌其事宜選學識高明通達治務者居之而詳  
擇其中上頗采用焉

葉訓導伯巨字居升浙江臨海人也慷慨有大節以



國子生分教平遙會星變詔求言慨然曰今天下  
有三事最切其二事易見而患小其一事難知而  
患大此三者積吾心久矣縱不求言吾猶言之况  
奉 明詔乎卽爲萬言書以獻其書曰臣聞王者  
上通於天王者之動上應乎天審天下之治否亦  
求端於天而已天有陰陽五辰日月以示之象德  
陰陽和調日月五辰順軌得度天下欲不善治而  
不可得也陰陽錯繆日月五辰不得其行天下欲  
善治而亦不可得也稽之天道察之人事可以驗  
治亂之實矣臣觀當世之事泰過者有三曰分封

大侈也曰用刑大繁也曰求治大速也臣愚不知  
星術藉以所聞於經傳據前世已行之得失而論  
之日君象也月臣象也詩曰彼月而食則維其常  
此日而食于何不臧今日月相刑是月敢抗於日  
臣敢抗於君之象也 主上掃除羣雄如踣草芥  
包絡豪傑如臂使指公侯列將擁十萬之衆戰勝  
攻取 朝廷馳一介之使臨召則拱手嚙命斯何  
以效相刑之應耶傳有之曰都城不過百雉先生  
之制大都三國之一中五之一小九之一上得以  
兼下下不得以兼上是先王所以強幹弱枝遏亂

原而崇治本用此道也今國家懲宋元孤立不振之弊裂土分封使諸王各有分地以樹藩屏諸王皆天子親子也皇太子親骨肉也分地雖廣制度雖奢所謂磐石之宗天下服其強何謂過侈哉然臣愚竊恐夫數世之後且尾大不掉也禮莫大於分使王侯之國與京畿同制則並列國矣尚何有於君臣之分乎今秦晉燕齊梁楚吳閩諸國皆盡其地以封連帶數十城而復優之以制假之以兵議者何不據漢晉之事而觀之也 孝景皇帝

高皇帝之孫也七國諸王皆同祖父昆弟之子孫

也一削其地則四面構兵而西向晉諸王皆武帝之親子孫也易世之後迭擁兵而相危由此言之分封踰制禍患立生此臣之所謂大過也皇天眷國譴告以相刑之象意豈在斯乎誠及諸王未之國時節都城之制減其衛兵限其疆理而舉以待諸王之子孫此制一定然後諸王中有聖賢之德者令入爲輔佐餘世爲藩輔與國同休而永世無窮割一時之恩以制萬世之利於以消天變而安社稷天下幸甚臣竊伏覩古開國之君未嘗不以尚德緩刑而結於民心亦未有不以專事刑罰而

失民心者也三代秦漢隋唐之國祚其修短可復  
矣易曰天地之大德曰生聖人之大寶曰位何以  
守位曰仁此可見天地好生之心卽聖王守位之  
德而禁民爲非之義特居其末明刑固聖人所不  
得已而用之者也古者斷死刑則天子爲之減膳  
撤樂故仁愛之篤結於民心愈久而不忘今議者  
曰宋元中葉而後紀綱不振專事姑息故有其位  
而不能守於是主上制不宥之刑權神變之法  
使人知所懼而莫能測其端臣竊伏以爲過矣夫  
開基之主垂範百世一動一靜必合準繩使刑政

不立而強暴得以相凌固國非其國使刑罰繁苛  
政治促急而民無所措手足亦豈天討天刑之意  
耶夫古之爲士者以登仕版爲榮以罷職不叙爲  
辱今之爲仕者以混迹無聞爲福受玷不辱爲幸  
其始也 朝廷摭摭網羅務無遺逸其繼也有司  
追迫上道如捕重囚泊乎居守一跌于法則刑戮  
隨之矣以屯田工役爲必獲之罪以鞭笞捶楚爲  
尋常之辱是亦豈人主之所樂爲之事哉誠欲人  
知懼而不敢犯也然數年以來誅殺亦可謂不細  
矣而犯者相踵非人之不懼法也由激濁揚清之

不明而賢否善惡之無別也議能之法廢故人不復自勵而爲善者怠也有人於此雖廉如夷齊智如良平一有註誤而罪不旋踵則中庸之才其將何地以自容耳必皆曰某廉若是某智若是而

朝廷不少貸吾屬何望故未仕之時修身畏慎動遵法守入官之後朝不謀夕苟捐廉耻固其所必至者而又何恠焉凡此皆用刑太煩之過也夫漢之世嘗徙大族於山陵矣未聞實之以罪人也今鳳陽 皇陵所在龍興之地而率謫罪人以居之怨嗟愁苦之聲充斥園邑非 朝廷所以共承宗

廟意也近令中都有願入軍籍聽免罪復官者宥而拘其餘丁家小以繫其心夫有罪之家長旣謫戍矣旣赦而任之以政矣餘丁家小夫復何罪而幽繫之哉非朝廷所以廣恩也夫摧強破敵則

揚清鼓銳奮三軍之氣而可矣今賊人僞四大王者突竄山谷如狐如鼠無迹可追設計捕之尚或可得而宿重兵以討之彼有駭而深匿耳又不能捕乃歸咎於新附戶籍之細民而遷徙之騷動數千里之地使不得寧息豈不過甚也哉夫新附之民皆前兵難流離朝廷所許之復業而來歸者



也今顧盡數而令之遷是法不信於民重苦之也夫有戶口而後田野闢田野闢而後賦稅增近遷徙之民雖蒙特旨已納稅租之家分釋遣還而餘畱開封聽候者散漫而不知所向臣恐自今北郡戶口不可復增矣何者小民易動而難安彼見夫新籍在官者尋獲遷徙而脫籍不報者顧易爲逃匿亦何樂而投籍以被其殃乎此皆臣所謂大過而召災者也郭璞有言陰陽錯繆皆煩刑所致願陛下錄大體赦小過明詔天下修舉八議之法嚴禁深刻之吏平允者超遷苛刻者放黜鳳陽屯田見

任家小者耕種自便已起戶籍見畱開封者放令  
復業如此則人主隆好生之德國祚樹綿長之福  
兆民安於下而天變消於上矣昔周自文武至于  
成康而後教化大行漢自高惠至於文景而後黎  
民醇厚文武高祖之才非不能使教化行而富庶  
効也天下之趨於治也猶堅冰之將泮然冰之堅  
非太陽一暴之力能消之也陽氣發生土脉震動  
然後能使之泮渙而融釋聖人之治天下由是也  
刑以威之禮以導之漸之以仁摩之以義而後其  
化熙熙也孔子曰如有王者必世而後仁此非空

言也今 國家紀元九年于茲矣天下大定紀綱  
既大正矣法令修行人心思治亦可謂帖然矣而  
主上切切以民俗澆漓人不知懼爲大故而峻刑法  
以威之故法出而奸生令下而詐起天下臣民莫  
知所適嚮而不能相安夫圖治於亂世之後猶理  
絲於旣棼之餘也緩之則端緒可得急之則雜亂  
而無紀今病民之不安奸邪之不止而朝夕異令  
賞罰無準君勞於上臣困於下治焉可得致哉故  
求治之道莫先於正風俗正風俗之道莫先於使  
守令知所務守令知所務莫先於使風憲知所重

風憲知所重莫先於朝廷知所尚朝廷知所尚必  
以簿書期會獄訟之不報爲可恕而俗流失世敗  
壞固其所不可不問者也古之郡守縣令民之師  
帥令以正率民導之於善使化成俗美者也征賦  
期會獄囚簿書特其一職耳風紀之司代 朝廷  
導宣風化訪善察惡條舉綱目而振治之者也聽  
訟讞獄特其一事耳今之守令以戶口錢糧獄訟  
簿書爲大故至農桑學校王政之本乃視爲虛文  
而不問將何以教養黎民哉憲司巡行亦循習故  
常而未嘗親察其興廢之實而獨以獄訟獲贓而

稱職其忠臣孝子義夫節婦當舉揚者視爲虛文  
末節忽棄而不省是徒知其去一賍吏決一獄訟苟  
目前之爲快而顧謬其本也郡邑生員升太學者  
未數月而授官使之爲政又何其太速也臣謂國  
家求治莫若敦禮義而尚廉耻守令則責其先撫  
字後征賦而以農桑學校爲急務風憲則責其先  
教化後法律而以平獄緩刑爲切要郡邑生員升  
太學者必令三年而上精通一經兼習一藝者然  
後入選或宿衛或辦事以觀大臣之能而後任之  
以政則學識兼懋以無敗事而又人知祿位皆天

之祿位而塞其覬覦之心此治體也夫分封有制則本支百世矣刑清罪簡則刑期無刑矣崇禮義尚廉耻則風移俗易矣於是主上端拱穆清淨之以歲月陰陽調而風雨時日月揚輝諸福嘉祥莫不畢至尚何天變之不可消哉臣愚賤猥不自度敢陳聞如此惟陛下以詢芻蕘之意而詳擇其中疏上上大怒以爲踈間我骨肉逮刑曹問狀瘦死獄中先是天子怒天下省府縣持空印籍詣部查稅賦以爲欺罔也詔逮行省臣及府州縣官于御史臺獄獄數百千人必欲置諸長吏於

死而佐貳攝篆者榜一百戍邊臨海人葉士利者  
兄嘗爲懷慶同知在繫中時丞相御史皆各知  
空印無他罪可恕莫敢諫士利獨歎曰上不知  
獨以爲空印者誠可罪故耳誠得人言之上明  
聖寧有不悟者懷切切欲言適星變下詔求直言  
士利曰可矣旣讀詔有假公言私者罪之之語士  
利曰吾所欲言者傷天子橫殺無罪爲可痛故  
言今言之以爲私吾兄兄非主印者固當出吾需  
兄杖出乃言言卽死不恨及兄免死出土利乃爲  
書數千言言數事而空印事最詳略以爲誠欲深

罪空印者顧獨恐奸吏得挾持空印紙僞文移爲  
奸耳臣以爲文移必完印乃可今考校冊書合兩  
縫而印於文移無用顧安所得私夫錢穀冊籍府  
必合之省省必合之戶部其數誠不可懸斷而豫  
決者也今省府遠者去部且六七千里近者二三  
千里待冊書成而後印則往來淹久期年不達故  
權空印而待稽此權宜之務所從來遠矣何足深  
罪且自立國以至于今未嘗有空印之律丞相御  
史舉不知其罪一旦捕而誅之不已過乎夫朝  
廷求賢才而置之庶位得之甚難其位至省司郡



守又皆數十年所成就廉明通達之賢非如草菅  
然可朝刈而夕生也 陛下奈何以不足罪之罪  
而不爲天下惜可用之才乎書旣成閉逆旅抱書  
伏床上泣者數日客問之曰卿何苦而泣士利曰  
吾自有所苦耳若何庸知已喟然曰我上書逢  
天子怒必死而餘人幸活庸何足顧乎遂起持書  
詣丞相府士利短小容貌如中人見丞相頗倨丞  
相問何書士利曰吾將爲 天子言之丞相何問  
也丞相因御史大夫入奏 上覽書大怒詔丞相  
御史大夫雜問主使名士利咲曰吾業爲國家言

事自分受禍誰適爲我謀者辭不屈論輸作終身  
竟殺空印者當是時寧海方孝孺者有學行從宋  
學士游學士亟稱之以吳沈揭樞薦召見 上喜  
其舉動端整而孝孺進對首以王道爲言 上謂

皇太子曰此莊士當老其才以輔汝 上每面試

舉子輒親定高下註選讀孝孺試文獨擲筆不註

曰異人也吾不能用畱爲子孫光輔太平足矣孝

孺歸杜門著述會仇家得罪辭連孝孺籍其家械

赴闕奏當 上識孝孺名曰是天台方生耶立命

開釋已又薦召至 上方重賞罰以孝孺志存教

化謂左右曰今非用孝孺時乃除漢中府教授詔  
水陸給車舟續食赴任

范敬先字思祖新建人洪武初舉進士授監察御史  
指陳闕失無忌諱一日忤旨命磔諸市磔者已披  
其兩乳敬先曰姑母相迫吾將有所獻索筆札具  
草進上閱之一詩也爲霽威命釋之謫充吏交  
趾未幾除趙王長史敗以嘗切諫僅削籍還家編  
氓或憐其貧助粟舟道遇親舊訴以寔立舉粟舟  
遺焉

稗史氏曰臣考觀解學士謨及桂生傳若天台生

遇主時事未嘗不流涕而歎歎高皇帝之心  
無猷念不在於子孫黎民也帝臣王佐涵濡沐浴  
裕賚于嗣昆則知播用重典烈烈于明威適運會  
實然不稱上本心矣易重坤而復贊之曰復其  
見天地之心臣於斯亦云